

Date – 26/05/2024

Time - 18:30 Hrs

1. Police department chuan Bairabi leh Sairang inkar rel kawng siamna a bungraw bo ni a sawi chungchanga hma la tha tawk lo anga puhna chu thu belhchian dawl lo a ni, an ti.
2. CYLA in Myanmar Rakhine State-a tuialhthei leh bungraw tawlh luh thin chu nizan zanlai atang khan an khap.
3. Aizawl District Special Branch (DSB) a thawkte Selesih ah heroin kg. 3 leh gram 457 an man.
4. Delhi Vivek Vihar-a naupang damdawi in-a kangmei chhuakah nau piang hlim 6 an thi.

<><><>

POLICE CLARIFICATION

Police department chuan Bairabi leh Sairang inkar rel kawng siamna a bungraw bo ni a sawi chungchanga hma la tha tawk lo anga Police-te puhna chu thu belhchian dawl lo a ni, an ti.

Police department hian thuchhuah siamin tun hnai a Northeast Frontier Railways thuneitute'n Chief Minister an hmuh denchhen a Railways bungraw bo leh thubuaiah te Police ten hma an la tawklo anga ngaih theih tura thu thehdarh awm chu thu belhchian dawlo nia sawiin, rel kawng siam mekah hian pawikhawihna a thlenin Police ten theihtawpin chhuichhuah hna an thawk thin a, thubuai tamzawkah bungraw rukbo te pawh hmuh let leh a ni, an ti. Home Department atanga hriattirna an dawn angin relkawng siam hna thawh meka harsatna leh thubuai lut awmah te hian Mizoram Police chuan theihtawpa hma a la thin a, Sairang Police Station, Kawnpui Police Station leh Bairabi Police Station-ah te hian rel kawng siam kaihhnawihah thubuai 28 ziahluh a nih thu sawiin ,thubuai hmasa ber chuDt. March ni 22, 2018 ah Kawnpui Police Station-ah ziahluh a ni a, thubuai thar ber hi Bairabi PS ah kumin March ni 9 khan ziahluh a ni bawka, he'ng zinga thubuai 26 chu rukruk kaihhnawih a ni a, thubuai dang 2 hi invau leh insuam thubuai a ni, an ti.

Bungraw bote hi rel kawng siam hnathawktute inkulhna hmun bul hnai leh hmanraw dah khawmna hmun atanga bo ani tlangpui a, rel kawng atanga bo a awm lo a tih theih a, chuvangin hnathawktute hriat lohva ruk bo chu a harsa tlangpui ang, an thuchhuah chuan a ti a. Rel kawng siamna hmanraw bote hi bungraw rit tak tak - steel shuttering, heavy duty MS pipe, drain slab, bridge steel gate, steel plate, copper cable, channel leh hook bolt te telin mi pakhat tana ruk mai theih a nih loh bakah motor-a phurh sawn ngaite an ni, an ti a. Thubuai ziah luh kaihhnawihah hian thil sual titu mi 62 man tawh an ni a. Pawikhawihtu man zingah hian hnam dang 14 a ti a ,thubuai thenkhatah phei chuan a hnathawktute pawh pawikhawihtu an ni tih hriatchhuah a ni a. Thubuai ziah luh 28 atang hian thubuai 19 a bungraw rukbo te hi Police te'n an hmu let leh a ni, an ti bawka.

Thilsualtitude chhui chhuak tur leh thil rukbote hmuh let leh tur hian Police te'n theihtawp an chhuah thin ni-in an sawi a. Thil bona hmunte uluk taka endik in rel kawng siam hna thawktute bakah a bul hnaia awmte uluk taka kawm thin an nih bakah thirchhe leikhawmtute dawr zawng chhuakin rukruk thil ni ngeia rinhlelh zuar an awm leh awm lohte uluk taka zawhfiah thin an ni, an thuchhuak chuan a ti a. Hei bakah hian pawikhawihna te a thlen nawn loh na'n leh rel kawng siamna bungruate a bo lohna turin Police te'n theih ang angin an vilpui a, rel kawng siamna hmunte tlawhin patrolling neih thin a ni bawka. Rel kawng siamna hmuna thawktute leh an hotute pawh be pawh an be pawh thin a, harsatna an neih chuan Police Station - ah hriattir vat tura hrilh hriat thin an nih thu an thuchhuah chuan an tarlang a ni.

<><><>

ASF RESURGENCE

Vawin khan Mizoramah African Swine Fever (ASF) vawk pulhri leng avangin vawk 3 thi-in hri darh zel tur ven na'n vawk 11 suat a ni.

Heti hian Mizorama ASF vawk pulhri avanga kumina thi zat chu 1,039 a tling tawh a, hri kai avanga tihlum 1,644 a ni tawh bawka. Kuminah hian district 6-ah ASF

vawk pulhri hi a leng mek a. ASF hri lenna ni a AH and Vety department-in an puante chu Aizawl, Champhai, Lunglei, Saitual, Khawzawl leh Serchhip district te a ni a. District dang zawng - Siaha, Lawngtlai, Kolasib, Mamit leh Hnahthial te chu vawk pulhri lakah hian an la him rih ni a ngaih a nih thu Vety department hotute chuan an sawi. Hetih lai hian district hrang hrang thuneitute chuan an district chhungah khuahkhirna thupek siamin vawk leh vawkte laklul leh lakchhuah an khap bakah ASF vawk pulhri lenna hmunah vawk talha a sa zawrh an khap mek bawk a. Vawksa leh a kaihnawih laklul khapna pawhsei zel a ni bawk a ni..

<><><>

BAN ON TRANSPORTATION

Central Young Lai Association (CYLA) chuan Lawngtlai leh Siaha district kaltlanga Myanmar Rakhine State-a tuialhthei leh bungraw tawlh luh thin chu nizan zanlai atang khan an khap.

Central YLA thuchhuahin a tarlan danin March thla laihawl vel atang khan Lawngtlai leh Lawngtlai District kaltlangin Myanmar ram Rakhine-ah eitur leh tui alh thei thahnem tak tawlh luh thin a ni a. Myanmar ram chu rambuai a nih avang leh Myanmar sipaite'n thlawhtheihna hmanga Rakhine chhunga beihpui an thlak thin avang leh Arakan Army hel pawl nena ramri a inbeihna a thlen fo avangin mipui tawrhna leh vanduai palh theihna a tam a. Hetiang a nih avang hian he thuchhuah hi siam ta an nih thu an tarlang a. Tuialhthei leh eitur thawn luh kawnga inhnawnawihthe chu tawpsan tura an ngen thu an thuchhuah hian an tarlang bawk.

Lawngtlai-a Akashvani Correspondent Lalngheeta Ralte sawi danin Rakhine State ah hian tuialhthei leh eitur mamawhna a san em vangin a Siaha leh Lawngtlai District a sumdawngte'n Lungpuk Siaha District kaltlangin an thawnlut nasa a. Bungraw phurh tur a awm tam lai phei chuan a bikin Lawngtlai district tualchhungah mamawh thila hman tur motor pawh awm mumal loh chang a awm thin a. Tuialhthei te pawh a van phah chang a awm bawk thin a ni.

<><><>

REFUGEES

Myanmar atangin Mizoramah raltlan an lo luh belh zel a, tunah hian Mizoram pumah Myanmar atanga raltlan awm zat chu 35,624 an tling tawh.

Zirtawpni khan zing atanga zan thlengin Champhai district-a Zokhawthar khua-ah raltlan 24 an lut tih Zokhawthar Village Level Committee on Myanmar Refugees hotute chuan an sawi a. Zokhawthar a lutte hi Myanmar rama Khampat, Phulmawi, Tahan, Tuivar leh Hmunlai khua atanga lo lutte an ni a. Zirtawpni zan vek hian raltlan 4 Saitual district-a Kawlbem khua-ah an rawn lut bawk a, anni hian he khua a an chhungkhat lainate an bel a ni. Nimin, Inrinni khan Zokhawthar khua-ah raltlan 27 an lo luh belh leh bawk. Raltlan lo lut tam ber hi Chin state hmar lam Tonzang, Cikha leh a chhehvel khua amite an ni a. Tonzang leh a chheh vel hnaiha Myanmar sipai camp-te chu Chin National Army (CNA) leh a tanrualpui 'mipui sipai' invuah pawl hrang hrang 14 tangrualin an laksak tawh a. Sipai tlan darh an umzui laiin Myanmar indo thlawhnate'n kar kal ta Nilaini zan thleng khan helai vel hi a la bomb zui reng ni a thudawn a ni.

Hetih lai hian Tedim leh Tonzang township chhak lam Tahan leh a bul hnai khua atangin raltlan an awm ve reng bawk a. Myanmar sipai-in sipai a tan luihtir an tum avang leh chhan dang dang avanga rawn tlanchhia an ni. Chhim lamah pawh Maraland Defence Force (MDF) leh Chinland Defence Force (CDF-Mara) te inkara innghirngona boruak a san vanga rawn tlanchhia mi 198 an awm bawk a. Anniho hi Siaha district a Laki, Lomasu leh Lopu khua-ah te an inbengbel mek a ni. Chin state chhim lam Paletwa khua leh a chhehvelah pawh Khumi hnamte chu Arakan Army hian an tihduhdah leh an pawla tan luihtir tumna avangin an sahimna zawngin an rawn raltlan bawk a ni. Khumi hi Mizo hnahthlak an ni a, mi 22 rawn tlanchhiate hi Lunglei district-a Khawmawi khua-ah an awm mek a ni.

<><><>

HEROIN HAUL

Aizawl SP pisa a District Special Branch (DSB) a thawkte chuan nimin khan Selesih a NEC Junction hmunah heroin kg. 3 leh gram 457 an man.

Hei hi Mizorama tum khata heroin man tam ber pawl a tling pha a, Police thuchhuah chuan an heroin man hi cheng vaibelchhe 1 leh nuai 6 hu niin an sawi. DSB hnathawkte hian an thudawn bawhzui-in Aizawl a an pisa atangin Selesih hi an pan a. C.T. Liana, kum 25, Tahan khawpui, Myanmar a cheng ni a inchhal scooter khalh atangin sahbawn bawm 311 chhunga thuhruk heroin hi an man ta a. Heroin tawlhthu leh neitu a puh C.T. Liana lakah hian Bawngkawn Police Station-ah Narcotic Drugs and

Psychotropic Substance Act, 1985 hmangin thubuai siamsak a ni a. Ruihlo lokalna leh hralh a tum dan bakah midang inhnamhnawih an awm leh awm loh chhui chian a la ngaih avangin Court phalna-in darkar 72 chhung Police-in an la kawl rih dawn a ni.

<><><>

CHURCHES UNITE

Evangelical Church of Maraland (ECM) leh Congregational Church of India (Maraland) Kohhran te chuan inremna thuthlung ziak felin an inchnunfin.

Kohhran insuihkawm lehna puala ECM tualchhung kohhran New Siaha-a a bik taka inkhawpui neih mekah, he inremna thuthlung hi Kohhran pahnih aiawhte'n Siaha District Judicial Magistrate hma-ah hming an ziak hnan a. ECM leh CCIM te hi Kohhran pakhat a awm thin an ni a, kum 1989 khan ECM atang hian CCI (M) Kohhran hi indangin kum 35 hnu, kumin hian an inzawm khawm leh a ni. Kohhran hming atan ECM tih chu lungrual taka pawm tlangin CCI (M) chu thiah nghal a ni. Kohhran insuihkawm ta hian kohhran puipate pawh an siam rem nghal a. Kohhran hmunpui atan Siaha khawpui pawm a ni bawk.

<><><>

DELHI HOSPITAL FIRE

Delhi Vivek Vihar-ah nizan khan naupang damdawi in-ah kangmei a chhuak a, nau piang hlim 6 an thih bakah midang engemawzatin hliam an tuar a, nau piang hlim 12 chhanchhuah hman an ni bawk. Tun dinhmunah nausen pakhat chu ICU-ah enkawl a ni a, nausen panga dang damdawi in-ah enkawl mek an ni.

Delhi Fire Services sawi danin, kangmei chhuah thu hi nizan dar 11 leh a chanve velah an dawng a, kang thelhtu 16 tirh nghal an ni. Kangmei chhuah chhan hi hriat a la ni lo.

President Droupadi Murmu, Vice President Jagdeep Dhankar-a leh Prime Minister Narendra Modi-a te chuan vanduinna thleng hi pawl an tih thu sawiin thi chhungte hnenah tawrhpuina an hlan a, Prime Minister chuan PM Relief Fund atangin thi chhungte hnenah zangnadawmna cheng nuai 2 theuh pek an nih tur thu leh hliamte hnenah cheng sing 5 theuh pek an nih tur thu a sawi a ni.

<><><>

UP BUS MISHAP

Uttar Pradesh Shah Jahanpur Dist-a nizana khualzin bus chesualah mi 11 an thi a, midang 10, na takin an hliam bawk. Police sawi danin, bus hi Sitapur atanga Uttarakhand-a kal tur a ni a, truck nen na takin an in su a ni.

<><><>